

NWER NYI JUD

¹ Me Jud wo, ji li nlokeltum no Jisos Kraist, me ji li mmonannyeahn Jems,* n kp'nyono nwer nyia tv ane ba Esowo ma lung bo, bo jio ji kpo kor Esowo Nsoo, bi ma-n kuuru bum Jisos Kraist.†

² Nong, Esowo kpe-n budu ndon enye gbalee, a elkoono, go elgoro.

Akimfahnge at'tibi

³ Akpondahme enyame, sahb kor-m kor re me n nyon tv-n bade eltahre ni e ma bel jang jang egom egom. Anv, me n seb kahn re, ga li re me n nyon nwer tv-n, nyi m bahk-n rehke re wahn nok ka etingitingi ji Esowo ma si y'yake kak ane ebe go ebo.‡

⁴ Tibre egom ane bandiki ba Esowo kil jo lub bo, ebba roongo yel go ero.§ Bobfere yaange nnoobo nyi Esowo ebahre, kp'taame re ane jo famme yanng. Bobten Jisos Kraist Ntul ewahre no li ntubesi ewahre ntahngtahng. Esowo nyono wuku wuku re, bo bahke lehke ebi jio.

⁵ Jol eji m ma k'kahn nsol nyia kpee, n kp'sebe re me m buum-n ana Jehova tahre abon Israel, yehke go ndi nyi Ijib. Eji ma kang, á r'ranng ane ba ki taame.*

⁶ Babenjel fvfo ba ki ma tob kuuru etul ebo, eji bo ta nnyab, tahm adi ellene ebo sa, Esowo k'kak

* 1:1 1:1 Mat 13:55 † 1:1 1:1 Jon 17:6 ‡ 1:3 1:3 Fil 1:27 § 1:4
1:4 Gal 2:4 * 1:5 1:5 1 Kor 10:5

bo agbekobo nya bo l'k'ma lohng go njinanjini, fere kpi bo kuuru go edi ejanng, kp'siki egburu efung elam.

⁷ Sodom, a Gomorra,[†] a ajahbe nya jolo senng bo kak jo limi eljini ana ni enjel nyao jo lim. Bo yake elbo ka go ebi elkpín, fere jo lim elkohn abiafem ni bo jo noongo a ane ba ki fuumu re bo noongo a bo. Esowo ebko bo, lim ejum erehke, tib eji bo kp'nyehne erem bi ellulagun ni li go njinanjini.

⁸ Mbang ny'nehm nyi abaleemalem baa kpo lim abiafem tob agubjing ebo. Bo kpehme taame re, Esowo jo fili bo. Bo kpo su na aj'jok ane ba li go ero.

⁹ Jol Maikel ji li ntubesi enjel limem ano. Eji bo jo taange abola nnehm, fere jo lim nfaabe bade ekv ji Moses, Maikel sahbem su nnehm, fere lame. Ji á bungu no, á bungu re, “Nong, Esowo nyam-a!”

¹⁰ Wo, ane bao kpo su nsol nyi bo kil elkahne. Nsol nyehka nyehka nyi njini nyia, nyi nyi bo kp'kahne ana enyam ekulugbe kp'tob kahn nsol, nyio nyi kp'ranng bo.

¹¹ Eyyu a bo! Tibre bo kp'jene go mbang nyi Ken.[‡] Bobyake elbo ka, fere kp'toono mbang nyi Belam tane no tib go esi akpohko.[§] Bobranng ana Kora ranng no, ji lame kak Esowo.

¹² Bo li ana anyakenyake adehbe go egahna nkak nyi n kpo li tib elgoro ni n kpi atemtem, tib eji bo kpi elrang lim. Jol ndon bo kpehme be. Bo kpo kpur elbo wo wo. Bo li ana akparesemsem

[†] 1:7 1:7 2 Pit 2:6 [‡] 1:11 1:11 1 Jon 3:12 [§] 1:11 1:11 2 Pit 2:15-16; Ell 2:14

nya kil jo na elahb, nya nfeb kpo kpu, tahm a nya. Bo li ana nti nyi kil jo kab akab ngare nyi nti kpo kab. Bo li ana nti nyi bo ma melle, nyi ma kpo nkpel ebal.

¹³ Bo li ana ebuku ji nne l'k'ma lim re rahke. Nsol ndon nyi bo kpo lim kp'tibi ana nfahl ebuku. Bo li ana alonlo nya ma be elbal. Esowo ebtoobo edi ji nkom ejanng li no bum bo. Owo bo bahke woomo go njinanjini.

¹⁴ Enohk wo jolo nne no biingi ane asehma bomo goji Adam. Ye wo tob nyehn enyehnamahr jia bade elkohn ane baa re, "Nyehn ana Ntul ma ba a abarebare ane ebe ba li mbud a nkunu,*

¹⁵ re á ba lam ane kpee, fere tib ane kpee ba kil jo kak Esowo ab'bi nsol nya bo lim-e no go mbang nyi bo l'k'kpe ma faabe, fere tib aneb abiafem ba kil jo kak Esowo alum kpee nya bo jo bung egban egban tob-e."

¹⁶ Bo li ane ba kpo memme, ba ejum ajehng ajehng kil jo nob go bo esamahr. Bo kp'toono nsol nyi kpo melle bo go bo a ntim. Bo kpo wor anyo kunu elbo, fere jo tehk ane go nnyo a nnyo, eji bo l'li bo nsehng.

Buumen alum nya abatiingetib Jisos

¹⁷ Akpondahme, buumen enyehnamahr ji abatiingetib Jisos Kraist, Ntul ewahre jo nyehn.

¹⁸ Bo tong-n re, "Es'kohro ngare anyok ane bahke jolo, ba kp'toono nsol nyi kpo melle bofono antahng go bo a ntim, nyi ki li nyi Esowo."†

* **1:14 1:14** Ell 19:14 † **1:18 1:18** 1 Tim 4:1; 2 Pit 3:3

¹⁹ Ane bao kpo ko ny'yabe ba a nyi. Bo li aneb njini. Etingi Etohko bo kpimm.‡

²⁰ Akpondahme enyame, jo kaken atemtem ebo, eji n l'gbal go nsol nyi Esowo, nyi li abarebare nsol nya sahb b'bar. Jo kaken ero go nsahm nyi Etingi Etohko.

²¹ Jo kuuren elnahne, wahn sa ano go elkoro ni Esowo, eji n kp'siki Jisos Kraist Ntul ewahre no bahk-n kake elkpini ni li go njinanjini tib go ege a ndon.

²² Nong, ane ba kpo faabe jo fil-n ndon.§

²³ Tahren egom jindiki yehke go agun.* Jo tiben ndon nyi li semme elfahle. Nong, ewobo ji kpi adale nyao nya abiafem jo sab-n.†

Ana Jud tehke Esowo

²⁴⁻²⁵ Nong, ellub, a agbal, a nsahm, a eko jol ka nne no bahk-n ma fili, n k'gbo,‡ fere ko-n je a nahne go ege esamahr bi ellub ene, eji n l'jol ane ba ki kpi ebi ajehng ajehng, fere jo bel eyebatahng. Ye wo li Esowo ntahngtahng, bi jolo mahne mahne, bi li anv, bi bahke jolo go njinanjini,§ ye ji tahr-r no sehng go abo nya Jisos Kraist Ntul ewahre. Emen.

‡ **1:19 1:19** Gal 5:22 § **1:22 1:22** Jon 1:46,50; 20:25,27 * **1:23 1:23** Jems 5:19-20 † **1:23 1:23** Ell 3:4 ‡ **1:24-25 1:24-25** Luk 22:31-32; 1 Kor 10:13 § **1:24-25 1:24-25** Ell 4:8; 21:6

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4